



ATASSUT

UPA15/79-1

Steen Lyngé

15.04.2015.

Siunnersuut Inatsisartunut aaliangigassanngorlugu Namminersorlutik Oqartussat oqaaseqaataat Kunngikkormiunut inassuteqaat Kalaallit Nunaannut atuuttussanngorlugu Inatsimmit nr. 1251 18. December 2012-meersumit, Inatsit nr. 311 29. Marts 2014-meersumit kiisalu Inatsit nr. 752 25. Juni 2014-meersumit Inuup normuanik inatsimmut allannguutissat.
(Aningaasaqarnermut Aatsitassanullu Naalakkersuisoq)

Inuup normuanik inatsimmi allannguutissatut siunnersuut pillugu Namminersorlutik Oqartussat oqaaseqaatissaattut Naalakkersuisut siunnersuutaannut ATASSUT-mit imaattunik oqaaseqaateqassaagut:

Iluarsimaarnarpoq Naalagaaffiup aammalu Namminersorlutik Oqartussat Inuup normuanik inatsisip allanngortinneqarnissaanik siunnersuut manna aqqutigalugu innuttaasut nalorninartumik inissisimasut tunngaviusumik pisinnaatitaaffiinik qulakkeerinninnissamik siunertaqarlutik suliaqarmata.

Ajoraluartumik piviusuuvoq angajoqqaat inooqatigiinngitsut qitornaminnik oqartussaassuseqaqatigiittut akornanni aaqqiagiinngittoqaleraangat meeqqamut/nut pitsaanerusussat sianigineqarnissaat tunullinneqartarnerat, taamaammat iluarisimaarnarpoq § 8-ip allanngortinneqarnissaanik siunnersuut aqqutigalugu aaqqiagiinngittoqartillugu meeqqap/meeqqat angerlarsimaffiat pillugu suliat qanoq ingerlanneqartarnissaat inatsisitigut isumannaarniarneqarmat.

Angutit inuttut normui avikkuminaatsunik kisitsisitaqarput (ulige) arnallu avikkuminartunik kisitsisitaqarlutik (lige), ATASSUT-mit apeqquserneqarsinnaanngitsumik ataqqinnippugut innuttaaqateqaratta inunnguutsiminnik kukkusumik suaassuseqartutut misigisimasartunik, aamma ataqqilluinnarparput taakku ilaat suaassutsiminnik allannguerusuttarmata, taakkulu soorunami suaassuseq misigisimasartik naapertorlugu inuttut normoqarsinnaanissaminnut pisinnaatitaaffeqartariaqarput.



Ajoraluartumik piviusuuvog inuup normuanik tillinniariarluni atonerluisoqartarnera, inuit taamatut nalaataqarsimasut ilaat annertoorujussuarmik aningaasatigut peqquuserluffigineqarsinnaasarput, allaat toqqissisimaasumik aningaasatigullu isumannaatsumik inuuneqaleqqinniarnarat sivisoorujussuarmik ingerlasinnaasarluni, pisut taamaattut inummut eqqugaasumut inuttut ataqqinassusiiianerupput sakkortoorujussuit, taamaammallu soorunami inuit kinaassutsiminnik tillinnarfigitissimasut inuttut normumik nutaamik tunineqarnissaminut pisinnaatitaaffeqartariaqarput.

Naak ATASSUT-mit ilinniartitsiniartutut inissisimarusungikkaluarluta, taamaattoq oqaaseqaaterput naggaserlugu eqqaasitsissutigissavarput suulluunniit pappiaqqat takussutissiallu inuttut normumik ersersitsisut paarilluaqqissaagassaammata, soorlu sumi najugaqarnermut uppernarsaatit, pas-sit allallu uppernarsaatit inuttut normumik ersersitsisut inuttaminnit paarilluaqqissaagassaapput.

Taamatut oqaaseqaateqarluta Inatsisartunut aaliangigassanngorlugu Namminersorlutik Oqartussat oqaaseqaataat Kunngikkormiunut inassuteqaat Kalaallit Nunaannut atuuttussanngorlugu Inatsimmit nr. 1251 18. December 2012-meersumit, Inatsit nr. 311 29. Marts 2014-meersumit kiisalu Inatsit nr. 752 25. Juni 2014-meersumit Inuup normuanik inatsimmut allannguutissatut siunnersuut ATASSUT-mit ilalerparput.